

**ՀՀ Կենտրոնական բանկի նախագահի  
Որոշում N 1/205L  
26/02/2009**

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԵՆՏՐՈՆԱԿԱՆ ԲԱՆԿԻ ՆՈՐՄԱՏԻՎ ԻՐԱՎԱԿԱՆ ԱԿՏԵՐԻ  
ՆԱԽԱԳԾԵՐԻ ՎԵՐԱԲԵՐՅԱԼ ՀԱՆՐՈՒԹՅԱՆ ԿՈՂՄԻՑ ԿԱՐԾԻՔՆԵՐԻ ՆԵՐԿԱՅԱՑՄԱՆ  
ՀՆԱՐԱՎՈՐՈՒԹՅՈՒՆ ԸՆԶԵՌԵԼՈՒ ՎԵՐԱԲԵՐՅԱԼ ԿԱՐԳԻ ՄԱՍԻՆ**

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԵՆՏՐՈՆԱԿԱՆ ԲԱՆԿԻ ՆՈՐՄԱՏԻՎ ԻՐԱՎԱԿԱՆ  
ԱԿՏԵՐԻ ՆԱԽԱԳԾԵՐԻ ՎԵՐԱԲԵՐՅԱԼ ՀԱՆՐՈՒԹՅԱՆ ԿՈՂՄԻՑ ԿԱՐԾԻՔՆԵՐԻ  
ՆԵՐԿԱՅԱՑՄԱՆ ՀՆԱՐԱՎՈՐՈՒԹՅՈՒՆ ԸՆԶԵՌԵԼՈՒ ՎԵՐԱԲԵՐՅԱԼ ԿԱՐԳԻ ՄԱՍԻՆ**

Հիմք ընդունելով «Հայաստանի Հանրապետության կենտրոնական բանկի մասին» Հայաստանի Հանրապետության օրենքի 18 հոդվածը.

**ՈՐՈՇՈՒՄ ԵՄ**

1. Հաստատել «Հայաստանի Հանրապետության կենտրոնական բանկի նորմատիվ իրավական ակտերի նախագծերի վերաբերյալ հանրության կողմից կարծիքների ներկայացման հնարավորություն ընձեռելու վերաբերյալ կարգը» (այսուհետև՝ Կարգ)՝ համաձայն Հավելվածի:
2. Հանձնարարել ՀՀ կենտրոնական բանկի (այսուհետև՝ Կենտրոնական բանկ) տեղեկատվական և հեռահաղորդակցման տեխնոլոգիաների վարչությանը սույն որոշման ուժի մեջ մտնելուց հետո 10 աշխատանքային օրյա ժամկետում՝ ապահովել Կարգի 3-րդ կետով սահմանված դրույթի իրականացումը, փոփոխել Կենտրոնական բանկի ինտերնետային կայքի «Նախագծեր» բաժինը Կարգի Հավելված 1-ով սահմանված ձևին համապատասխան, ինչպես նաև իրականացնել Կենտրոնական բանկի ինտերնետային կայքի «Նախագծեր» բաժնի ծրագրային ապահովումը:
3. Սույն որոշումն ուժի մեջ է մտնում 2009 թ. ապրիլի 1-ից:

Հայաստանի Հանրապետության

կենտրոնական բանկի նախագահ

ԱՐԹՈՒՐ ԶԱՎԱԴՅԱՆ

**ԿԱՐԳ**

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԵՆՏՐՈՆԱԿԱՆ ԲԱՆԿԻ ՆՈՐՄԱՏԻՎ ԻՐԱՎԱԿԱՆ ԱԿՏԵՐԻ ՆԱԽԱԳԾԵՐԻ ՎԵՐԱԲԵՐՅԱԼ ՀԱՆՐՈՒԹՅԱՆ ԿՈՂՄԻՑ ԿԱՐԾԻՔՆԵՐԻ ՆԵՐԿԱՅԱՑՄԱՆ ՀՆԱՐԱՎՈՐՈՒԹՅՈՒՆ ԸՆՁԵՈՒԵԼՈՒ ՎԵՐԱԲԵՐՅԱԼ**

**1. ԸՆԴՀԱՆՈՒՐ ԴՐՈՒՅԹՆԵՐ**

1. Սույն կարգը կարգավորում է Հայաստանի Հանրապետության կենտրոնական բանկի (այսուհետ՝ Կենտրոնական բանկ) խորհրդի նորմատիվ իրավական ակտերի նախագծերի (այսուհետ՝ Նախագծեր) վերաբերյալ հանրության կողմից կարծիքների ներկայացման հնարավորություն ընձեռելու հետ կապված հարաբերությունները:

2. Սույն կարգի դրույթները չեն տարածվում այն Նախագծերի վրա, որոնք օրենքի համաձայն պարունակում են գաղտնի տեղեկություններ:

3. Կենտրոնական բանկի ինտերնետային կայքի «Նախագծեր» բաժնում Նախագծերի տեղադրման համար սահմանվում է աղյուսակ՝ համաձայն Հավելված 1-ի աղյուսակ 1-ի:

**2. ՆԱԽԱԳԾԵՐԻ ՏԵՂԱԴՐՄԱՆ ԿԱՐԳԸ ԿԵՆՏՐՈՆԱԿԱՆ ԲԱՆԿԻ ԻՆՏԵՐՆԵՏԱՅԻՆ ԿԱՅԸՈՒՄ**

4. Կենտրոնական բանկի Վարչության նիստում տրված հանձնարարականի համաձայն՝ նախաձեռնող ստորաբաժանումը լրամշակման ենթակա Նախագծերը՝ Վարչության նիստին հաջորդող 5 աշխատանքային օրվա ընթացքում տրամադրում է Կենտրոնական բանկի արձանագրային բաժնին (այսուհետ՝ Արձանագրային բաժին):

5. Արձանագրային բաժինը Վարչության նիստին հավանությանը արժանացած Նախագծերը Վարչության նիստին հաջորդող աշխատանքային օրվա ընթացքում, իսկ լրամշակման ենթակա Նախագծերը նախաձեռնող ստորաբաժանման կողմից ստանալու պահից 1 աշխատանքային օրվա ընթացքում տրամադրում է Կենտրոնական բանկի Հասարակայնության հետ կապերի ծառայությանը:

6. Արձանագրային բաժնից Նախագծերը ստանալուց հետո 1 աշխատանքային օրվա ընթացքում Հասարակայնության հետ կապերի ծառայությունը դրանք տեղադրում է Կենտրոնական բանկի ինտերնետային կայքի «Նախագծեր» բաժնում՝ պիտակելով այն «ՆՈՐ» բառով:

**3. ՀԱՆՐՈՒԹՅԱՆ ԿՈՂՄԻՑ ՆԱԽԱԳԾԵՐԻ ՎԵՐԱԲԵՐՅԱԼ ԿԱՐԾԻՔՆԵՐԻ ՆԵՐԿԱՅԱՑՈՒՄԸ**

7. Նախագծերի տեղադրման օրվանից 14 աշխատանքային օրվա ընթացքում հանրությունը հնարավորություն ունի իր կարծիքն ուղարկել Կենտրոնական բանկի ինտերնետային կայքի «Նախագծեր» բաժնի աղյուսակ 1-ի «Հետադարձ կապ» սյունակում նշված համապատասխան էլեկտրոնային հասցեներով: Նշված 14-օրյա ժամկետը կարող է փոփոխվել, ելնելով նախագծի միջոցով կատարվող փոփոխությունների հրատապությունից և կարևորությունից, եթե Վարչության նիստում քննարկվող նախագծի վերաբերյալ նման որոշում կայացվի:

8. «Նախագծեր» բաժնի աղյուսակ 1-ում տեղադրված ժամկետի ավարտից հետո 10 աշխատանքային օրվա ընթացքում նախաձեռնող ստորաբաժանումը շահագրգիռ ստորաբաժանումների հետ քննարկում է ներկայացված կարծիքները և ընդունված կարծիքների արդյունքում լրամշակված Նախագծերը ներկայացնում Կենտրոնական բանկի խորհրդի նիստին՝ ամփոփ տեղեկանքում նշելով քննարկումների արդյունքում չընդունված կարծիքները և դրանք չընդունելու հիմնավորումները: Քննարկումների ընթացքում, ելնելով նպատակահարմարությունից, Նախագծի վերաբերյալ կարծիք ներկայացրած անձին կարող է հնարավորություն տրվել մասնակցելու քննարկումներին՝ դրա մասին նրան հայտնելով (էլեկտրոնային փոստի կամ հեռախոսի միջոցով) քննարկումից առնվազն 3 աշխատանքային օր առաջ:

#### 4. ԻՆՏԵՐՆԵՏԱՅԻՆ ԿԱՅՔՈՒՄ ՓՈՓՈԽՈՒԹՅՈՒՆՆԵՐԻ ԿԱՏԱՐՈՒՄԸ

9. Սույն կարգի 7-րդ կետում նշված՝ կարծիքների ընդունման համար տրամադրված ժամկետի ավարտից հետո Հասարակայնության հետ կապերի ծառայությունը խմբագրում է Կենտրոնական բանկի ինտերնետային կայքի «Նախագծեր» բաժնի աղյուսակ 1-ի բովանդակությունը՝ հանելով տվյալ Նախագծի վրա դրված «ՆՈՐ» պիտակը՝ պասիվացնելով «Հետադարձ կապ» սյունակի համապատասխան էլեկտրոնային հասցեն:

10. Հասարակայնության հետ կապերի ծառայությունը Կենտրոնական բանկի ինտերնետային կայքի «Նախագծեր» բաժնի աղյուսակ 1-ից հանում է Կենտրոնական բանկի խորհրդի կողմից հաստատված Նախագծերը և դրանց վերաբերող այլ տեղեկատվությունը դրանց՝ Կենտրոնական բանկի խորհրդի կողմից հաստատվելուց հետո 1 աշխատանքային օրվա ընթացքում:

11. Նախագիծը խորհրդի նիստում հաստատվելուց հետո նախագիծը մշակող ստորաբաժանումը ամփոփում է ընդունված և չընդունված կարծիքները, այնուհետև կազմում է ամփոփ տեղեկանք տվյալ նախագծի վերաբերյալ կարծիքների ընդհանուր քանակի և ընդունված ու չընդունված կարծիքների ընդհանուր քանակների վերաբերյալ՝ 2 աշխատանքային օրվա ընթացքում տրամադրելով Հասարակայնության հետ կապերի ծառայությանը:

12. Հասարակայնության հետ կապերի ծառայությունը՝ յուրաքանչյուր Նախագծի համար, սույն կարգի 11-րդ կետի համաձայն ներկայացրած ամփոփ տեղեկանքները հավաքագրում է, և սույն կարգն ուժի մեջ մտնելուց հետո եռամսյա պարբերականությամբ դրանց տեղեկատվության հիման վրա յուրաքանչյուր եռամսյա ժամանակաշրջանի ավարտին հաջորդող 5 աշխատանքային օրվա ընթացքում Կենտրոնական բանկի ինտերնետային կայքի «Նախագծեր» բաժնի աղյուսակ 2-ում հրապարակում է հակիրճ վիճակագրական տեղեկատվություն՝ նշելով տվյալ եռամսյակի ընթացքում խորհրդի նիստում հաստատված Նախագծերի, ստացված և ընդունված կարծիքների ընդհանուր քանակները:

**Ինտերնետային կայքի «Նախագծեր» բաժնի նոր բովանդակությունը**

**«Հարգելի ընթերցող**

Կենտրոնական բանկի կայքի այս բաժնում պարբերաբար տեղադրվում են Կենտրոնական բանկի նորմատիվ իրավական ակտերի նախագծերը: Կարևորելով հետաքրքրվող կառույցների և անհատների հնարավորինս լայն մասնակցությունը Կենտրոնական բանկի նախաձեռնություններին՝ ակնկալում ենք ներկայացվող փաստաթղթերի վերաբերյալ ստանալ Ձեր կարծիքները:

Կենտրոնական բանկը տեղեկացնում է մաս, որ մեր ցանկացած ՆՈՐ որոշման նախագծի վերաբերյալ Ձեր կարծիքները կարող եք ներկայացնել աղյուսակում նշված համապատասխան ժամկետներում՝ մեզ հետ կապ հաստատելով ստորև ներկայացված աղյուսակում նշված համապատասխան էլեկտրոնային փոստի հասցեներով: Էլեկտրոնային մասնակներին կարող եք կցել Ձեր կարծիքները հիմնավորող այլ փաստաթղթեր:

Ստորև ներկայացված աղյուսակի «Կարծիքների ընդունման ժամկետի ավարտ» սյունակում նշված ամսաթվին հաջորդող 10 աշխատանքային օրերի ընթացքում Ձեր կողմից ներկայացված կարծիքները կքննարկվեն Կենտրոնական բանկում և այդ ընթացքում, ելնելով նպատակահարմարությունից, Դուք կստանաք քննարկումներին մասնակցելու հրավեր:

Աղյուսակ 1

N	Նախագծի անվանումը	Կարծիքների ընդունման ժամկետի սկիզբ	Կարծիքների ընդունման ժամկետի ավարտ	Հետադարձ կապ
1.				
2.				
3.				

Աղյուսակ 2

Եռամսյակ	Նախագծերի ընդհանուր քանակը	Ստացված կարծիքների ընդհանուր քանակը	Ընդունված կարծիքների ընդհանուր քանակը

Կենտրոնական բանկի կողմից մշակված նախագծերի և ընդունած որոշումների վերաբերյալ Ձեր կարծիքները մշտապես կարող եք ուղարկել [mcba@cba.am](mailto:mcba@cba.am) էլեկտրոնային փոստի հասցեով:



*Կենտրոնական բանկի կայքի այս բաժնում գետեղված նյութերը գտնվում են նախագծային փուլում և պաշտոնապես հրապարակված չեն: Նախագծերը, պաշտոնական հրապարակումից հետո, կտեղադրվեն Կենտրոնական բանկի կայքի [Օրենքներ](#) և [Այլ իրավական ակտեր բաժիններում](#) »*